

RELACION

PËR

PROJEKTLIGJIN “PËR DISA SHITESA NË LIGJIN NR.93/2015, “PËR TURIZMIN”, TË NDRYSHUAR”

I. QËLLIMI I PROJEKTAKTIT DHE OBJEKTIVAT QË SYNOHEN TË ARRIHEN

Përgatitja e projektligjit “Për disa shtesa në ligjin nr.93/2015, “Për turizmin”, të ndryshuar” është mbështetur në nenet 78, 81, pika 1, dhe 83, pika 1, të Kushtetutës.

Në kuadër të luftës pa kompromis ndaj krimit të organizuar, ky projektligj është hartuar me qëllim e vetëm për të mos lejuar përfitimin, mbështetjen dhe lehtësitë e parashikuara nga ligji jo vetëm për investitorët/operatorët menaxhues, të cilët janë të dënuar me vendim të formës së prerë për kryerjen e veprave penale, të cituara në nenin 1, të këtij projektligji, por edhe për personat e dënuar me një vendim gjyqësor të formës së prerë që janë anëtarë të një organi administrativ, drejtues ose mbikëqyrës, apo që kanë kompetenca përfaqësuese, vendimmarrëse ose kontrolluese brenda investitorit/operatorit menaxhues.

II. VLERËSIMI I PROJEKTAKTIT NË RAPORT ME PROGRAMIN POLITIK TË KËSHILLIT TË MINISTRAVE, ME PROGRAMIN ANALITIK TË AKTEVE DHE DOKUMENTE TË TJERA POLITIKE

Projektligji nuk është i parashikuar në programin analitik të projektakteve, por miratimi i tij vjen si një domosdoshmëri për trajtimin e fenomeneve shumë problematike të hasura në praktikë.

III. ARGUMENTIMI I PROJEKTAKTIT LIDHUR ME PËRPARËSITË, PROBLEMATIKAT, EFEKTET E PRITSHME

Në bazë të legjislacionit për turizmin në fuqi, çdo investitor/operator menaxhues, që synon të fitojë mbështetje dhe lehtësi, duhet të plotësojë, paraprakisht, disa kushte, të cilat ndahen në kushte ligjore, ekonomiko-financiare dhe teknike. Nëse kushtet ekonomiko-financiare dhe kushtet teknike synojnë të sigurojnë që subjekti fitues i kontratës/marrëveshjes publike është i aftë ta zbatojë atë, kushtet ligjore synojnë të sigurojnë që kontrata/marrëveshja publike po lidhet me një subjekt privat, që funksionon në përputhje me legjislacionin dhe rregullat në vend dhe ka integritet, profesionalizëm dhe përgjegjshmëri.

Kjo nismë ligjore u ndërmor duke pasur në konsideratë ndjeshmërinë e qeverisë për të luftuar kriminalitetin në vend, për të shmangur në çdo rast dhe me çdo mjet dhënien e kontratave/marrëveshjeve publike, të mirave publike dhe fondeve publike investitorëve/operatorëve menaxhues të dënuar penalisht.

Një parashikim i tillë, ku përjashtohet nga mundësia për të fituar një kontratës/marrëveshje publike jo vetëm investitori/operatori menaxhues, që ka një dënim penal si subjekt juridik, por edhe kur këtë dënim e kanë edhe individët, përfaqësues të subjektit, do të shmangë çdo mundësi që investitori/operatori menaxhues apo edhe individët, përfaqësues të tyre të dënuar penalisht, të fitojnë kontrata/marrëveshje publike.

Ky rregullim i posaçëm do ta bëjë jo vetëm më serioze, por edhe më konkrete luftën me të gjitha mënyrat kundër krimit në Shqipëri.

IV. VLERËSIMI I LIGJSHMËRISË, KUSHTETUTSHMËRISË DHE HARMONIZIMI ME LEGJISLACIONIN NË FUQI VENDAS E NDËRKOMBËTAR

Projektligji “Për disa shtesa në ligjin nr.93/2015, “Për turizmin”, të ndryshuar”, propozohet në mbështetje të neneve 78 dhe 83, pika 1, të Kushtetutës.

V. VLERËSIMI I SHKALLËS SË PËRAFRIMIT ME ACQUIS COMMUNAUTAIRE (PËR PROJEKTAKET NORMATIVE)

Ky projektligj nuk synon përafrim me *acquis* të BE-së.

VI. PËRMBLEDHJE SHPJEGUESE E PËRMBAJTJES SË PROJEKTAKTIT

Në nenin 6 të ligjit, numërohet paragrafi i parë me numrin 1, dhe pas tij shtohen pikat 2 e 3, me këtë përmbajtje:

“2. Përjashtohet nga mbështetja dhe lehtësitë e parashikuara në kreun VI, të këtij ligji, çdo investitor/operator menaxhues kur ka të dhëna se është ose ka qenë i dënuar me vendim gjyqësor të formës së prerë, për ndonjë nga veprat penale të mëposhtme:

- a) Pjesëmarrje në grup të strukturuar kriminal, organizatë kriminale, bandë e armatosur, organizatë terroriste;
- b) Korrupsion;
- c) Mashtrim;
- ç) Pastrim parash ose financim i terrorizmit;

- d) Vepra me qëllime terroriste ose vepra penale të lidhura me veprimtari terroriste, ose nxitje, ose ndihmë ose mbështetje për kryerjen e veprave penale me qëllime terroriste;
- dh) Organizim, drejtim ose financim i veprimtarisë së prodhimit e të shitjes së narkotikëve, si dhe veprimtari të trafikimit të narkotikëve;
- e) Falsifikim;
- ë) Puna e fëmijëve dhe forma të tjera të trafikimit të qenieve njerëzore.

Përfshirja nga mbështetja dhe lehtësitë zbatohet edhe kur personi i dënuar me një vendim gjyqësor të formës së prerë është anëtar i një organi administrativ, drejtues ose mbikëqyrës i tij, aksionar ose ortak i investitorit/operatorit menaxhues, ose ka kompetenca përfaqësuese, vendimmarrëse apo kontrolluese brenda tij.

3. Për përfitimin e mbështetjes dhe të lehtësirave të parashikuara në kreun VI, të këtij ligji, investitori/operatori menaxhues duhet të paraqesë vërtetim nga dosja gjyqësore ose një dokument, të lëshuar nga një autoritet kompetent, që vërteton se nuk ekzistojnë kushtet e parashikuara në pikën 2, të këtij neni.”.

VII. INSTITUCIONET DHE ORGANET QË NGARKOHEN PËR ZBATIMIN E PROJEKTAKTIT

Ngarkohet ministria përgjegjëse për turizmin për zbatimin e këtij projektligji.

VIII. PERSONAT DHE INSTITUCIONET QË KANË KONTRIBUAR NË HARTIMIN E PROJEKTAKTIT

Projektligji është hartuar nga Departamenti Rregullator dhe i Përputhshmërisë, në Kryeministri.

Projektligji është bashkërenduar me Ministrinë e Drejtësisë, Ministrinë e Financave dhe Ekonomisë dhe Ministrinë e Turizmit dhe Mjedisit.

IX. RAPORTI I VLERËSIMIT TË TË ARDHURAVE DHE SHPENZIMEVE BUXHETORE

Miratimi i këtij projektligji nuk sjell efekte financiare shtesë në buxhetin e shtetit.

KËSHILLI I MINISTRAVE